

## Hesus ta Habri e Kaminda pa Medio di e Velo

*Les 10 di kuartaal 1, aña 2022*

Les a pa e siman aki:

Heb. 9:24; Eks. 19:3, 4; Heb. 12:18-21; Lev. 16:1, 2; Heb. 10:19-22; Kol. 3:1.

### TEKSTO PRINSIPAL:

"Pasobra Cristo no a drenta den un lugá santo trahá ku man, djis un kopia di' esun berdadero, ma den shelu mes, awor pa paresé den' e presensia di Dios pa nos" (Hebreo 9:24, Beibel Santu).

## Hesus ta Habri e Kaminda pa Medio di e Velo

*sabbat, 26-02-2022*

Ora ku e disipelnan a bolbe for di e Seru di Oleifi, net despues ku Hesus a subí bai shelu, nan wòrdu yená ku goso i triunfo. Nan Maestro i Amigu a subi bai na e poseshon di poder riba e mundu i a invitá nan pa hala serka Dios den Su nòmber ku e konfiansa absoluto ku Dios lo respondé favorablemente na nan orashonnan (Huan 14:13, 14). Aunke ku nan a sigui den e mundu, ataká pa e forsan di maldad, nan speransa tabata fuerte. Nan tabata sa ku Hesus a subi pa prepará un lugá pa nan (Huan 14:1-3). Nan tabata sa ku Hesus tabata e Kapitan di nan salbashon, i ku El a habri un kaminda den shelu pa medio di Su sanger.

E asenshon di Hesus na shelu ta sentral pa e teología di Hebreo. E ta marka e komienso di Hesus Su gobernashon i e komienso di su ministerio di Sumosaserdote na nos favor. Finalmente, i mas importante, Hesus Su asenshon ta marka e momento ku e aliansa nobo, ku ta proveé e medionan pa medio di kua nos por aserká Dios ku kurashi pa medio di fe, a wòrdu inougurá. Ta nos privilegio awor pa aserka Dios ku konfiansa pa medio di Hesus i e méritonan di Su hustisia.

Studia e lès di e siman akí pa prepará pa Sabat, 5 di mart.

## Hesus Dilanti di e Tata

*djadumingu, 27-02-2022*

### **Les a Hebreo 9:24. Segun e porshón akí, kua tabata e propósito di Hesus su asenshon pa shelu?**

Dios a instruí Israel bisando ku nan hende hòmbènan mester bai tres bia kada aña na Herusalem pa "presentá dilanti di Señor" ku un òfrenda. E tempunan stipulá tabata e fiesta di Pasku (Pan Sin Zürdeg), e Fiesta di Simannan (Pentekostes), i e Fiesta di Tabernakelnan (Eks. 23:14-17, Deut. 16:16). Pasku tabata pa selebrá Israel su liberashon for di Egipto. Pentekostes tabata pa selebrá kosecha di puspas i, den tempu di Tèstament Nobo, e tabata wòrdu asosiá ku e dunamentu di e leí na Sinai. E Fiesta di Tabernakelnan tabata pa selebrá Dios Su kuido pa Israel durante di nan estadía den desierto.

Hebreo 9:24 ta deskribí Hesus Su asenshon den e presensia di e Tata. El a yega na e santuario selestial, "esun berdadero," pa E por "paresé" den e presensia di Dios ku un mihó sakrifisio (Heb. 9:23, 24, Beibel Santu) Su propio sanger.

Hesus a kumpli ku e fiesta di peligrinahe ku eksaktitut asombroso. El a muri riba e día di preparashon di e Pasku na e di nuebe ora, e momento den kua e lamchinan di Pasku tabata wòrdu sakrifiká (Huan 19:14, Mat. 27:45-50). Hesus a resusitá riba e di tres dia i a subí bai den shelu pa risibí siguransa ku Su sakrifisio a wòrdu aseptá (Huan 20:17, 1 Kor. 15:20), ora ku e saserdote mester a zoya e bohí di puspas hechu komo e promé frutanan (Lev. 23:10-12). Despues, El a asendé 40 dia despues pa sinta na e man drechi di Dios i inougurá e aliansa nobo riba e Día di Pentekostes (Echonan 1, 2).

E proposito di peligrinahe den Israel antiguo tabata pa "mira kara di Dios" (Sal. 42:2, BPK). Esaki tabata nifiká eksperensia e favor di Dios (Sal. 17:15). Similarmente, e ekspreshon hebreo di "buska e kara di Dios" tabata nifiká pidi Dios yudansa (2 Kron. 7:14, Sal. '27:8, Sal. 105:4). Esaki ta e sentido, den Hebreo, di Hesus Su asenshon. Hesus a asendé na shelu tambe komo Esun ku ta bai nos dilanti den e presensia di Dios (Heb. 6:19, 20). El a hasi e promesa pa e kreyentenan ku ta biaha "buskando un pais di nan mes," deseando "un mihó país" anhelando na "e stat...di kual Dios ta arkitekto i konstruktor" (Heb. 11: 10, 13-16, Beibel Santu).

**Atrobe, di kon e realidat di loke Kristu a hasi, no solamente na e krus pero loke E ta hasiendo awor akí den shelu, mester duna nos e siguransa di salvasbon?**

## Dios Su Invitashon

*djaluna, 28-02-2022*

### **Les a Hebreo 12:18-21. Kua tabata e eksperensia di Israel na Seru di Sinai?**

Ora ku Dios a yama Israel for di Egipto, Su plan tabata pa krea un relashon personal i íntimo ku nan. El a bisa, "Boso mes a mira kiko Mi a hasi ku e egipsionan, i kon Mi a karga boso riba hala di águila hiba boso serka Mi"(Eks. 19:3, 4, Beibel Santu).

Pües, pa medio di Moisés Dios a duna e instrukshonnan nesesario pa prepará e pueblo pa topa kunE. E hendenan mester a konsagrá nan mes promé (Eks. 19:10-15). Esnan ku tabata subi sin preparashon lo a muri. Sinembargo, unabes e hendenan a prepará nan mes pa dos dia, e ora ei" 'ora nan supla kachu di karné chubatu ku un zonidu largu' "riba e di tres dia, Dios a instruí pa e pueblo" 'mag subi e seru' " (Eks. 19:13, Beibel Santu). E tabata ke pa nan tin e eksperensia ku Moisés i e lidernan di e pueblo lo tabatin ora ku nan subi riba e seru i "nan a mira Dios, i nan a kome i bebe"den Su presensia (Éks. 24:9-11, Beibel Santu). E pueblo a rekonosé despues ku nan a mira Dios Su gloria i ku tabata posibel pa Dios papia" ' "ku hende, i tòg e ta keda na bida" "(Deut. 5:24, Beibel Santu). Pero, ora e momento a yega, nan a karesé fe. Moisés a splika añanan despues: " ' boso tabatin miedu pa motibu di e kandela i boso no a subi bai riba e seru"(Deut. 5:5, Beibel Santu). Na lugá di esei, nan a pidi Moisés pa bira nan intermediario (Deut. 5:25-27, kompará ku Eks. 20:18-21).

Dios Su manifestashon di Su santidat na Seru di Sinai tabata pa siña e hendenan pa "teme,"òf respet'E. E "temor di Señor" ta hiba na bida, sabiduría, i honor (Peut. 5:25-27, Deut. 4: 10; kompará ku Sal. 111:10, Prov. 1: 7, Prov. 9:10, Prov. 10:27) i tambe siña ku E ta misèrikordioso i yen di gracia (Eks. 34:4-8 ). Pues, mientras Dios tabata ke pa Israel bini serka djE, e pueblo a haña miedu i a pidi Moisés pa bira nan intermediario. E deskripsion di e eventonan na Sinai den Hebreo ta sigui primordialmente Moisés su rekòrdatorio na e hendenan di nan falta di fe i nan apostasía ku e bisé di oro, i kon e tabatin miedu di topa ku Dios pa motibu di nan piká (Deut. 9:19). E pueblo su reakshon no tabata Dios Su plan pa nan; na lugá di esei, e tabata e resultado di nan falta di fe.

### **Pa motibu di Hesus, di kon nos no mester tin miedu di hala serka di un Dios santu? Sinembargo, kiko ta e kondishonnan pa nos por hala serka?**

115

## E Nesesidat di un Velo

*djammers, 01-03-2022*

Velonan tin dobel funshon. E término ku Hebreo ta usa pa velo (katepetasma) por referí na e skèrm di e korte (Eks. 38:18), e skèrm na e entrada di e kamber mas pafó di e santuario (Eks. 36:37), òf e velo parti paden ku ta separá e Lugá Santu for di e Lugá Santísimo (Eks. 26:31-35). E velonan akí tabata tantu entradanan i límitenan ku solamente algun hende por a krusa.

### **Les Levitiko 16:1, 2 i Levitiko 10:1-3. Ki atvertensia nos tin den e porshónnan akí?**

E velo tabatá un protekshon pa e saserdotenan mientras nan tabata ministrá dilanti di un Dios santu. Despues di e piká di e bisé di oro, Dios a bisa Moisés ku E lo no kompañá nan riba e kaminda pa e Tera Primintí amenos ku E kaba ku nan pasobra nan tabata un " 'pueblo kabesura' "(Eks. 33:3, Beibel Santu). Pues, Moisés a kita e tèt di reunion i a lant' é leu, pafó di e kampa (Eks. 33:7). Sinembargo, despues ku Moisés a interседé, Dios a bai di akuerdo pa bai meimei di nan (Eks. 33:12-20), pero El a stablesé varios midí pa protehá e pueblo mientras E tabata keda meimei di nan.

Por ehèmpel, Israel tabata kampa den un órden estrikto ku tabata krea un kuadrángulo bashí na e partí meimei kaminda e tabernakel tabata. Adishonalmente, e Levitanan tabata kampa rondó di e tabernakel pa por prótehá e santuario i su mobilario abuso di stranheronan (Num. 1:51, Num. 3:10). De echo, nan tabata un tipo di velo humano pa protehá e pueblo di Israel: " 'Ma e, levitanan mester kampa rònt di e tabernakel di testimonio, pa no tin furia riba e kongregashon di e yunan di Israel. Asina e levitanan mester keda enkargá ku e tabernakel di testimonio' " (Num. 1:53, Beibel Santu).

Hesus, komo nos Saserdote, tambe tabata nos velo. Pa medio di Su enkarnashon, Dios a lanta Su tèt meimei di nos i a hasi posibel pa nos por kontemplá Su gloria (Huan 1:14-18). El a hasi posibel pa un Dios santu por biba meimei di un pueblo imperfekto.

**Pensa tokante di kiko tabata nifiká pa e Kreador Dios, Esnun ku a traha e universo, por biba meimei di Su pueblo, kende na e momento ei tabata un nashon di katibunan ku a skapa. Kiko esei ta siña nos tokante di kon serka Dios por ta di nos?**

## E Kaminda Nobo i Bibu Pa Medio Di e Velo

*djarason, 02-03-2022*

### **Les a Hebreo 10:19-22. Kua invitashon nos tin den e porshón akí?**

E buki di Hebreo ta bisa ku Hesus a drenta den e santuario selestial i ta invitá nos pa sigui Su guiansa. E pensamentu akí ta den akuerdo ku e konsepsion introdusí promé ku Hesus ta e "kapitan" i Esun ku ta bai dilanti di e kreyentenan (Heb. 2:10; Heb. 6:19, 20; Heb. 12:2). E "kaminda nobo i bibu" ta e aliansa nobo ku Hesus a inogurá ku Su sakrifisio i asenshon. E ekspreshon "nobo i bibu" ta kontradesí e deskripsion di e aliansa bieu komo "antikuá i bieu" (Heb. 8:13, Beibel Santu). Ta e pakto nobo 1 ku a proveé pordon di piká i a pone e leí den nos kurason, ta hasi posibel pa nos por aserká Dios ku konfiansa, no pa motibu di nos mes òf nada di loke nos a hasi, pero solamente pa motibu di loke Hesus a hasi pa nos dor di kumpli ku tur e obligashonnan di e aliansa.

Hebreo ta mostra ku e inogurashon di e aliansa bieu tabata enserá e inogurashon di e santuario i e konsagrashon di e saserdotenan (Heb. 9:18-21; kompará ku Éksodo 40; Levitiko 8, 9). E propósito di e aliansa tabata pa krea un relashon íntimo entre Dios i Su pueblo (Eks. 19:4-6). Ora ku Israel a asepta e relashon akí, inmediatamente Dios a ordená pa e santuario por wòrdu konstruí pa E por biba meimei di nan. E inogurashon di e santuario i Dios Su presensia meimei di Su pueblo tabata e momento ora ku e aliansa entre Dios i Israel a wòrdu kumplí. Meskos ta bèrdat pa loke ta trata e aliansa nobo. E aliansa nobo tambe ta enserá e inogurashon di Hesus Su ministerio saserdotal na nos favor (Heb. 5:1-10, Heb. 7:1-8:13).

Hesus Su asenshon dilanti di Dios a inogura un era nobo pa e pueblo di Dios. Zakarias 3 ta mensioná ku Satanás tabata den e presensia di Dios pa akusá Dios Su pueblo, kende tabata wòrdu representá pa e sumosaserdote Hosué. E akusadó akí ta esun tambe ku a lanta preguntanan tokante di Job su lealdat na Dios (Job 1, 2). Sinembargo, ku e sakrifisio di Hesus, Satanás a wòrdu saká for di shelu (Rev. 12:7-12, kompará ku Huan 12:31, Huan 16:11). Awor ta Hesus ta interesadé pa nos i pa medio di Su sakrifisio i fieldat ta reklamá salbashon pa nos!

**Kua akusashon Satanás por hasi kontr'i bo dilanti di Dios si e haña permit pa hasi esaki? Aunke e ta un gañadó, kuantu lo e tin ku gaña pa buska bo kondena? Kiko ta bo úniko speransa?**

## Nan Lo Mira Su Kara

*djaweps, 03-03-2022*

### **Les a Hebreo 12:22-24. Den ki sentido nos a yega na e Herusalem selestial den e presencia di Dios?**

Ta wòrdu bisá ku kreyentenan "a bini" na Seru Sion, e Herusalem selestial, pa medio di fe. Den e sentido akí, nan eksperensia ta antispá e futuro. Pues, e Herusalem-selestial ta pertenesé na e reino di kosnan "ku hende ta spera" i "no ta mira" pero sinembargo sigurá na nos pa medio di fe (Heb. 11:1).

Mientras esaki ta bèrdat, e no ta e nifikashon kompleto di e porshón akí. Nos tambe a yega na e Seru di Sion, den e presencia di Dios, pa medio di nos representante Hesus (Efe. 2:5, 6; Kol. 3:1). Hesus Su asenshon no ta un kuestion di fe, pero un echo. Ta e dimenshon históriko akí di Hesus Su asenshon ta proveé forsa konvinsiente na e eksortashon di Hebreo pa tene duru na nos konfeshon (Heb. 4:14, Heb. 10:23). Pablo ta bisa: "Komo ku nos tin anto un gran Sumosaserdote, Kende a pasa dor di e shelunan,..laga nos aserká...ku konfiansa" (Heb. 4:14, 16, Beibel Santu).

Pues, ya nos a yega pa medio di nos representante i, p' esei, nos mester aktua di e manera ei. Pa medio di djE, nos "a purba e don selestial... i ku a purba e bon palabra di Dios i e podernan di e siglo ku ta bin" (Heb. 6:4, 5, Beibel Santu). E realidat di Hesus Su asenshon i ministerio den e santuario selestial ta "un anker di e alma, un speransa sigur i firme" (Heb. 6:19, Beibel Santu), e garantía ku e promesanan tin sustansha i ta digno di konfiansa (Heb. 7:22). Pa nos, fe tin un anker históriko.

Sinembargo, Dios Su propósito lo wòrdu kumpli no solamente den Hesus pero den nos tambe. Nos a bisa ku Hesus Su asenshon a kumpli ku e tipología di e promé dos peligrinahanen annual di Israel, Pasku i Pentekostes. Segun Hebreo i e buki di Revelashon, e último peligrinahe, e Fiesta di Puspas, ainda tin ku keda kumplí. Nos lo selebr'é ku Hesus, ora ku nos ta den e "stat...di kual Dios ta e arkitekto i konstruktor," den e país selestial (Heb. 11:10 [Beibel Santu}, 13-16). Nos lo no konstruí tabernakelnan, pero Dios Su tabernakel; òf tèt, lo baha for di shelu, i nos lo biba kunE pa semper (Rev. 7:15-17; Rev. 21:1-4; Rev. 22:1-5; Num. 6:24-26).

**Kon nos por siña pa hasi e promesa di bida eterno real pa nos awendia, meimei di un mundu asina yen di doló i sufrimentu ki kontesta bo por duna na esnan ku ta bisa ku esaki tur ta djis un fantasía pa yuda nos sinti mihó tokante di nos bida presente?**

## Mas Estudio:

*djabierne, 04-03-2022*

"Kristu su asenshon na shelu tabata un siñal ku Su siguidornan lo risibí e bendishon primití. Pa esaki nan mester a warda promé ku nan drenta den nan trabou. Ora ku Kristu a pasa den e portanan selestial, El a wòrdu entroná meimei di e adorashon di e angelnan. Asina ku e seremonia akí a finalisá, e Spiritu Santu a baha riba e disipelnan den gran forma, i Kristu realmente a wòrdu glorifiká, asta ku e gloria ku E tabatin ku e Tata pa tur etemidat. E derame pentekostal tabata shelu su komunikashon ku e inougurashon di e Redentor a wòrdu kumplí. Segun Su promesa El a manda e Spiritu Santu for di shelu pa Su siguidornan komo un muestra ku El a, komo saserdote i rei, risibí tur outoridat den shelu i riba tera, i tabata Esun Ungí riba Su pueblo....

"Nan por a bisa e nòmber di Hesus ku siguransa; pasobra E no tabata nan Amigu i Ruman Mayó? Tresí den komunion será ku Kristu, nan a sinta kunE den e lugánan selestial. Ku lenguahe bunita nan tabata bisti nan ideanan mientras nan tabata fungi komo testigu p'E!"-Ellen G. White, The Acts of the Apostles, pp. 38, 46.

Preguntanan pa Diskushon:

**1.** E salmista a bisa: "Mi alma tin set di Dios, di e Dios bibu; ki dia lo mi bin i presentá dilanti di Dios?" (Sal 42:2, Beibel Santu). Kon nos por tin e mesun set pa bini den e presensia di Dios? Si nos no regosihá awor den e presensia di Dios mientras nos ta ador' E i ta presentá Su dilanti den fe, nos lo regosihá den futuro? Kua ta e faktornan ku ta hiba na goso dilanti di Dios?

**2.** Den un buki ku ta hasi bòfón di fe, un hende a krea un robot ku supuestamente ta kere pa nos. aunke esaki tabata un mòfa, kon nos por tene kuidou pa nos no hasi manera Israel a hasi den e desierto, kual ta pa pidi intermediario entre nos i Dios? Nos tin tendensia di permití otro hende studia Beibel pa nos i haña e goyanan di bèrdat den Beibel. Algun hende por sinti tentá pa pensa ku e orashonnan di otronan na nan favor tin mas peso dilanti di Dios ku nan propio orashonnan. Di kon nos mester evitá e trampa spiritual akí? Di kon, pa motibu di Hesus, nos por aserká Dios sin e nesidat di niun otro hende?

**3.** Hebreo ta tokante di siguransa di salbashon. Kon anto nos mester tene kuidou pa no brua presumshon pa siguransa?